


Apologie de l'Edit du  
Roy sur la pacification  
de son royaume

1564



33

1. 1999

APOLOGIE  
DE L'EDIT  
DV ROY SVR LA  
PACIFICATION DE  
SON ROYAVME,

CONTRE  
*La Remonſtrance des eſtats de  
Bourgongne.*

PSEAVME 2.

Pourquoy ſe mutinent les gens, & mur-  
murent les peuples en vain?

M. D. LXIIII.



Case

F

39

.326

1564 a/po

THE NEWBERRY  
LIBRARY

55-289

3.  
APOLOGIE DE L'EDIT

DV ROY SVR LA PA-

cification de son  
Royaume.



Eluy qui n'est atteint,  
esmeu, & esguilloné  
de l'amour de la patrie,  
du bien public, & de son  
Prince, doit estre repu-  
té & estimé par le consentement d'un  
chacun aliéné & estrangé de toute hu-  
manité. Car selon le dire de ce diuin  
Platon nous ne sommes pas naiz seule-  
ment pour nous mesmes, ains la patrie  
s'attribue la principale partie de nostre  
naissance, le besoin s'y offrant. Ce que  
cognoissans plusieurs anciēns Romains,  
ont exposé leurs vies pour la conserua-  
tion de leur Republique, tant que ia-  
mais n'ont voulu ny peu souffrir & en-  
durer que chose quelcōque fust atten-  
tee & entreprise au detriment d'icelle.  
De mesme zele ne faut douter qu'ayēt  
esté plusieurs gentils-hommes Frâçois,  
& n'en soient ordinairement poussez,

quand, selon les necessitez suruenâtes,  
 ils n'espargnēt leurs corps & vies pour  
 la defense & hōneur de nostre Prince.  
 Car c'est le chef de toute la patrie, sous  
 le soin & bon conseil duquel consiste  
 la protection & entretenement du re-  
 pos public, ainsi que tous les membres  
 de nostre corps naturel sont sous la sol-  
 licitude & sauuegarde du chef: Auquel  
 si les autres membres pour leur con-  
 seruation ne vouloient obeir & seruir,  
 iamais le corps ne demeureroit en son  
 entier. Ce que si diligemment & soi-  
 gneusemēt auoit esté consideré & pesé  
 par plusieurs mal affectiōnez, ils ne se-  
 meroient parmy le peuple des propos  
 si desauantageux contre les Edits du  
 Roy nostre sire, ainsi qu'il est facile de  
 cognoistre par la lecture d'une Remō-  
 strance des deputez du Duché de Bour-  
 gogne sur l'Edit de la pacification.  
 Laquelle estant venue entre mes mains  
 apres l'auoir leuë avec le plus soigneux  
 iugement qu'à moy a esté possible, ie  
 n'ay peu me contenir, que ie n'aye mis  
 la main à la plume pour y donner ce  
 mot de responce. A quoy entreprendre  
 plus hardiment, m'a donné courage,



5.  
Je diray plustost contraint & forcé, l'obeissance & affection que ie dois à mon Roy, ayant en son ieune aage pour conduite vne mere Roine tant sage & autant entre nous recommandable, que Iudith entre le peuple d'Israël, conseillée de Princes & Seigneurs remplis de prudence & discretion, bon conseil & aduis, ioint le grand amour qu'ils ont à la tranquillité de nostre Republique. Je desirerois tresvolontiers, que ceux qui ont mis en auant ceste Remonstrance, fussent & eussent esté douez & ornez de l'esprit de douceur & paix, ainsi qu'Helie le Prophete, & tous autres saints ont esté, tel qu'eux-mesmes le souhaitent auoir mis dedans la plus grande partie du peuple François pendant ces troubles passez. Car ils eussent obey à la volonté du Roy, Suyuant laquelle ne fussent issus tant de tumultes entre le peuple de nostre Frâce, & aussi n'vseroient en leur Remonstrance de traits si inconsiderez & mal digerez comme ils font.

Et afin que ie ne parle sans preuue, n'est-ce pas vne parolle non seulement inconsiderement, ains temerairement

escrîte quād monsieur l'Orateur, vous  
 dictes, que si on veut esplucher les af-  
 faires par le menu, que la couleur de  
 tollerer les sectes à l'imitation des pre-  
 cedens Empereurs Chrestiens se trou-  
 uera faulse, & de dangereux conseil, &  
 pernicieux exemple. Car en ce vous  
 reprenez & accusez les gēs doctes, ver-  
 sez en la lecture des histoires, autant où  
 plus que vous pourriez estre, qui sont  
 du conseil priué du Roy, & les notez  
 d'auoir donné mauuais aduis au Roy  
 sus l'Edit de la pacification de son Roy-  
 aume, en ce blasmt les raisons qui les  
 ont esmeus à ce, & les voulez declarer  
 fauteurs & amateurs de vices, en ce  
 qu'ils mettent en auant deuāt les yeux  
 d'un ieune Roy & de son peuple mau-  
 uais exēples. Ce que iamais n'eust esté  
 de vous mis par escrit, si parauant vous  
 eussiez esté aucunement touché de cō-  
 passiō du miserable & calamiteux estat  
 de ce Royaume. Mais que vous ayez  
 failly en ces termes, il sera facile de le  
 iuger, à ceux qui se voudront despouil-  
 ler de toute sinistre affection. Apres, ie  
 vous prie, quelle est ceste humilité, de  
 laquelle vous protestez vouloir main-



tenir que iamais n'y eut bon Empereur  
 ny Prince sage, qui se soit tant oublié,  
 que de permettre l'exercice publique  
 d'une religion contraire à la sienne. La  
 vraye humilité consiste en l'obeissance  
 des commandemēs de Dieu. Or Dieu  
 commande de ne mesdire de son Prin-  
 ce. Si vous ne faites le contraire, i'en  
 laisse le iugement à ceux qui sont exer-  
 cez en la conuersion des propositions:  
 laquelle seroit facile à declarer, si elle  
 n'estoit mieux entendue, que ie ne la  
 pourrois esclarcir. Si donc ie vous puis  
 prouuer que les bons Empereurs, & sa-  
 ges Princes, ont permis & tolleré reli-  
 gion contraire à celle qu'ils tenoient,  
 vous reuiendrez, comme ie pense, à re-  
 congnoissance de vostre faute. Pour ce  
 faire ie m'aideray premieremēt de ceux  
 que vous proposez, & vous cōbatray  
 de vos armes. Certes fort à propos vo<sup>us</sup>  
 remettez en memoire à nostre Roy la  
 sentēce de ce bon Empereur Iouinian,  
 lequel quant fut esleu Empereur pro-  
 testa à haute voix, qu'il ne vouloit do-  
 miner, sinon qu'aux Chrestiens. Je m'as-  
 seure que pareille est la volonté de no-  
 stre Roy, suyuant le tiltre qui luy est

donné de Treschestien. Car nō plus que Iouinian voudroit souffrir en son Royaume des Payens, Gētils, & Idolatres. Veu que ie suis Chrestien, disoit Iouinian, ie ne veux regner sus ceux qui veulēt estre Gentils & Idolatres. Ainsi

Li.3.chap.  
22.

le recite Socrates en son histoire Ecclesiastique. Mais en ce debat présent de la Religion, qui est celuy qui vueille estre appelé Idolatre? Chasque partie se dit & proteste estre Chrestienne: toutefois differente du Christianisme. De ceste maniere de parler vse le susdit auteur

Li.4.chap.  
Sozo.li.6.  
chap.6.

Socrates, disant, de deux freres Empe- reurs Valens & Valentinien: Eux deux estoient Chrestiens, differens toutefois quāt à la foy du Christianisme. Neant- moins l'un, assaouir Valēs, estoit Arrian pour la vie. En ceste façon quelqu'un pourroit dire que les vns & les autres sont Chrestiens, & que nōtre Prince ne cōmande sinon qu'aux Chrestiens, voire mais diuers pour le regard de la forme du Christianisme.

Or sus, le susdit Empereur Iouinian n'a il permis en son Empire Religion contraire à la sienne? le vous renuoye- ray, mōsieur le correcteur des Edits du Roy,



Roy aux historiēs Ecclesiastiques, à sçauoir Nicephore & Socrates. Ausquels on peut veoir, que les Macedonians & Arrians estoient pour lors en bruit & vogue, iacoit que l'Empereur eust en honneur & reuerence seulement les Catholiques. Duquel le dessein estoit, selon le recit de Nicephore, de rompre & enfreindre l'affection de cōtention & dispute entre les parties, plus par persuasion, que par force & violence, & de ne molester aucun, quelque party de la foy qu'il suyuiſt, & de ne laisser rien qui fust profitable à maintenir entre ses ſuiets ſouueraine charité: Aincois de porter honneur tresgrād à tous, qui ſ'efforceroient de reduire l'Eglise en concorde & vnanimité. De ce luy portent tesmoignage non ſeulement les Chrestiens, ains celuy qui est entre les Grecs fort renommé. Themiste le Philoſophe en l'Oraison laquelle il luy a eſcrit, nommee Cōſulaire. Car apres auoir fait recit de ſes vert<sup>9</sup>, & luy auoir dōné louanges diuines, pour ceſte cauſe principalement le louē & magnifiquement extolle, de ce qu'il a permis à vn chacun la Religion qui luy vien-

li. 10. cha.

41. 42. 43.

li. 3. cha. 22.

&amp; 25.

droit à gré. En quoy ils disent qu'il a surmonté l'importune assentation des flatteurs: desquels se moquât & gabant fort facetieusement, disoit par leurs meurs estre cogneu qu'ils reueroient beaucoup plus la courōne & robe Imperiale que Dieu, & qu'ils ne differoiēt pas fort de l'Euripe, qui maintenāt çà, maintenant là se coule & recoule par fois & costez contraires. A la mienne volonté que tant d'vne part que d'autre les cours des Princes ne fussent farcies de telle espece de gens. Voyez dōc, Remonstrant tres-subtil, comment nostre proposition vniuerselle negative peut estre vraye, puis qu'il se trouue vn bon Empereur, & sage Prince, qui a tolleré & permis Religion contraire à la sienne. Nostre ieune Salomon par son Edit nous fait vn mesme commandement que Constantin le grand faisoit en pareils troubles pour la Religiõ à tous ses peuples, escriuant à Alexandre & Arrius, ainsi que le recite Eusebe en son second liure de la vie d'iceluy. Nul soit facheux à aucun, vn chascun face ce qu'il aura destiné en son esprit. Qu'aucun ne blesse autrui, parce qu'il



estime & se persuade estre meilleur. Ce qu'autre a cognu & entēdu, par ce mesme, si faire ce peut qu'il profite à son prochain, si faire ne le peut qu'il fabstienne, & ne die mot. Approuuant Eusebe à la fin du liure le mandement de ce bon Empereur cōclud en ces termes C'estoit le meilleur & plus commode, que par vertu de donner lettres edits & commissions, faire que la contention & dissention des debatans fust augmentee & prist cours par toutes les prouinces de l'Oriēt. Tu vois pour le present quel a esté le cōseil & aduis de ce saige Prince pour appaiser les troubles qui isoient & sourdoient pour la diuersité de la religion, non semblable à celuy, que tu veux donner à nostre Roy Treschrestien. Vray est que le susdit Empereur vsa de plus grāde rigueur apres le Concile de Nice. Mais il faudroit pour le iourd'huy & seroit de besoin pour cōuaincre ceux, que tu estime heretiques assembler vn Concile de mesme sorte de libre acces & suffrage ou fust suiuiue en tout & par tout la doctrine Euāgelique & traditiō apostolique à l'exemple de noz maieurs. Lors nous verriōs

cesser toutes contentions, & qui y des-  
 obeiroit, seroit sans doute tenu pour  
 seditieux, mutin & heretique, pour luy  
 estre interdit de l'Eglise & de la com-  
 pagnie des hommes. Ce mesme empe-  
 reur, iacoit qu'il eust publié vn Edit cō-  
 tre les heretiques, deffendāt à iceux de  
 faire aucunes assemblees, n'a toutefois  
 compris sous ceste cōstitutiō les No-  
 uatians, & de fait auoit en grand hon-  
 neur & estime vn de leurs Euesques  
 nōmé Acesius pour sa bonne & sainte  
 vie. La cause de ceste permissiō, dit Ni-  
 cephere, estoit qu'ils auoient vne mes-  
 me opinion du fils de Dieu avec l'Egli-  
 se Catholique. Neantmoins les Noua-  
 tians estoient contraires à la remission  
 des pechez, qui se donne au sacrement  
 de Penitence. Entre ceux que l'on ap-  
 pelle de la religion nouvelle, y trouue-  
 rez vous des Nouatians, Arrians, Va-  
 lentinians, Marcionistes, Seruetistes,  
 & Anabaptistes? La cōfession qu'il en  
 ont fait à Poissy publiquement le des-  
 couure. Mais ils sont sacramentaires.  
 Ils le nient, le proces en pend au croc.  
 Et au colloque dudit Poissy, se presen-  
 terent pour en estre conuaincuz. Lon

Lib. 8.  
 cha. 152.



demeura sus (est & non est, existit & nō existit.) Jusques donc à l'euietiō pour-  
 quoy ne pourra nostre Roy pour la trā-  
 quilité de son Royaume, leur permet-  
 tre eglises & assemblees comme le sus-  
 dit bon Empereur à fait aux Nouatiās,  
 veu que ceux-ci consentent quant aux  
 principaux articles de nostre foy avec  
 l'Eglise Catholique? Venons mainte-  
 nant à Valentinian premier, que vous  
 dites auoir esté l'vn des plus Catholic-  
 que du monde. Comment fest il gou-  
 uerné enuers ceux qui estoient cōtrai-  
 res a la foy, laquelle il soustenoit. Assez  
 clairement le declare Socrates en son Li. 4. ch. 11  
 Histoire ecclesiastique en ces termes:  
 Valētinian deffendoit ceux, qui estoiet  
 conforsts de son opinion: mais ce pen-  
 dant n'estoit aucunement facheux aux  
 Arrians. De mesmes & semblables pa-  
 roles à vsé Sozomene: Qu'il aye souf- Li. 6. ch. 6  
 fert exercice de Religion contraire à la  
 sienne, il appert assez par le discours des  
 susdits auteurs. Passons plus outre à  
 Theodoze le grand, duquel vous vous  
 fortifiez, comme d'un rampart le plus  
 fort que vous eussiez peu rencontrer.  
 Il a veu de son tēps quatre sectes d'he-

retiques, à sauoir Arrians, Macedoniās, Eunomians, & Nouatians. Or faut-il sçauoir qu'il n'a pouruiuy & persecuté aucun d'iceux, sinon qu'un seul Euno-nius, & n'en a contraint aucun de cō-muniquer avec soy, ains leur a permis de s'assembler chacun en leurs maisons & domicilles, & sentir du Christianisme ainsy que chacun en son endroit en pouuoit entendre & conceuoir l'intelligence. Et aux vns a ottroyé de bastir oratoires hors les villes. Mais a voulu & commandé que les Nouatians, comme conformes à sa foy, eussent leurs eglises dedans l'entour des villes. Ce

Li. 5. ch. 20  
Li. 12. ch. 19

font les propos de Socrates & de Nicephore. Je confesse bien que depuis il fit vn Edit, par lequel il defendoit aux heretiques de ne plus faire conuenticules & assemblees, de n'enseigner plus rien de la foy, de n'instituer plus d'Euesques. Outre commandoit qu'ils fussent de-iertez des villes & bourgades, non par le peuple vulgaire, comme tu mets en auant, ains par les ministres de sa Iustice: plus qu'ils fussent despouilleez & priuez de tous estats & dignitez: & qu'ils n'eussent de mesme police avec les



autres citoyens. Mais il n'a mis en execution & effet son Edit. Car son soin n'estoit de punir & greuer ses suiets par trop grande seuerité, ains de les contenir en obeissance, & les retirer de mal par crainte, pour les rendre vnis & conformes à sa foy. Sozomene & Nicepho li. 7. ch. 12  
 re, & qu'il les ayent soufferts, il appert li. 12. ch. 15  
 par le recit des Euesques Aeterodoxes qui regnoient pour lors, que les susdits historiens font. Quant à la Remōstrance de cest admirable Amphilo chius, qui luy fut faite pour faire defense aux Arriās de faire assemblees, pour le deshonneur qu'ils faisoient au fils de Dieu, ceux que vous nommez aduersaires de la foy vous respondent qu'ils abhorrent toutes semblables opinions, & les condamnent comme heretiques, & neantmoins on vous pourroit respondre que le zele de ce grand personnage estoit louable, toute fois plus seuer que la loy Euangelique, & la douceur de l'Eglise Catholique ne requiert. Apres luy donnez-moy, ie vous supplie, monsieur le Conseiller, loisir de prendre avec vous plaisir en la consideration de la comparaison que vous faites de nostre ieu-

ne Roy & le ieune Valentinian, de Iustine sa mere & de la Roine mere du Roy. De quelque part, ainsi que le declarez, ceste comparaison est receuable en ce que l'un & l'autre Prince se trouuent de mesme aage: l'une & l'autre mere auoir le gouuernement de leurs fils: mais ie vous demande, ie parle familièrement avec mon amy, si nostre Roy a esté tant mal enseigné & instruit en la foy Catholique, cōme auoit esté ce ieune Empereur de sa mere Iustine? Donnez-m'en quelque preuue euidente & i'approueray vostre dire. L'une estoit contraire à la foy Catholique, Nostre Roine la soustient avec ses ancestres: L'une auoit persuadé à son fils de faire Edits cōtre la foy Catholique, Nostre Roine la maintient par son conseil: & l'edit qu'elle a procuré, & en icel le entretient son fils, tant qu'en elle est possible, selon mesme vostre propre confession. L'une dechassoit les Euesques Catholiques hors de leurs Eglises. Nostre Roine les y remet, & les conserue en leurs droits: mais que veut signifier le los & honneur que tu luy donnes d'auoir maintenu & defendu le party  
de



de l'Eglise Catholique, & toutefois tu  
 veux faire entendre au Roy, que son  
 Edit, qui a esté composé & publié par  
 le consentement & conseil de ceste rai-  
 sage & prudente Roine de Saba, est au  
 grand desauantage d'icelle Eglise Ca-  
 tholique de laquelle il est protecteur,  
 iacoit qu'il soit tout notoire que l'Edit  
 n'a esté pour autre cause promulgué,  
 sinon que pour la defense & tuition  
 des Catholiques, comme auparauant  
 auoit esté l'Edit de Ianuier, duquel en-  
 tre-vous Bourguignons auez esté les  
 plus obstinez infracteurs & refusans,  
 comme par vostre propre escrit vous  
 en vantez. Que fussent deuenues les  
 Eglises des Catholiques, qui n'y eust  
 remedié par l'Edit? En quel lieu les  
 Euesques & autres ministres Ecclesia-  
 stiques se fussent-ils osé retirer? A pa-  
 ris? Cōme si ceste ville pouuoit en soy  
 contenir toute la France. Qui eust esté  
 la retraite du poure peuple Catholi-  
 que pour la cōmunion des Sacremens,  
 prieres & oraisons? Quel ordre de iu-  
 stice fust resté par tout le Roiaume? En  
 quel lieu de seureté nostre Prince se fust  
 il peu retirer pour se mettre en repos?

Où eust esté l'amour du Prince , la reuerence & obeissance qui luy est deuë? Bref , la charité & le lien d'amitié duquel doiuent estre liez & conioints ensemble tous Chrestiens? Quel lieu eust peu rencontrer pour son domicile & repaire? Si le cōmun dire est vray, que les loix se tiennent coy entre les armes, c'estoit donc vn faire le faut, d'oster les armes & pacifier les troubles, pour restituer en son honneur, force & vertu les loix, sans lesquelles aucune Republique ne peut consister. A ceste cause, tāt s'en faut que l'Edit du Roy destruisse & aneantisse la pieté, qu'au contraire il la confirme, corrobore, conserue, & remet en son entier. Voyez donc maintenant combien vous estes esloignez de raison, de parangōner vn Roy Treschrestien, & sa mere tant Catholique, avec vn Empereur foruoyé de la foy, & sa mere heretique: Vn Edit tendant à la paix & vnion, & l'entretene-ment de l'Eglise Catholique, avec vn Edit seditieux, lequel venoit à ses fins d'abatardir & ruiner la foy des Peres & maieurs, contre les statuts de l'Eglise Catholique.



Ce sont les propres traits de l'historien Ruffin. Et ne faut douter que monseigneur le Chancelier, duquel la foy a esté de tout temps & sacree & venerable, de non moindre zele & ardente charité enuers Dieu, & le repos public, que Beneuolus Chancelier de l'autre Prince, n'eust refusé & denié, voire iusques à la demission de ses estats, & plus de sa propre vie, s'il eust cogneu, que par la publicatiõ de l'Edit eust esté impugnee la foy, & l'estat de l'eglise Catholique renuersé. Dequoy, veu qu'il appert du contraire, vostre Remonstrance & admonition est de nul poix & valeur, par laquelle vous admonnestez nostre Roy tant sage & bien aduisé de se donner de garde que Dieu ne luy suscite des ennemis, qui mettent leurs efforts à le priuer & despouiller de sa couronne, comme il auoit esleué à Valentinian Maxime le tyran. Car par l'Edit de la pacification il a sustrait & effacé toutes les couuertes & occasions de susciter troubles, & prendre les armes sous pretexte de la Religion, de telle façon & maniere que Maximus, lequel les guerres intestines perscuerâtes eust eu plu-

sieurs imitateurs de sa tyrānie à depos-  
 feder le Roy, de sa maiesté Royale, si  
 par le conseil d'un sage Beneuole, &  
 force d'un bon Theodose ne luy eust  
 esté donné secours, & ayde prompt. Or  
 vn chacun cōfesse qu'il n'y a vertu plus  
 seante & conuenable à vn ieune Roy,  
 que la clemence, douceur & mansue-  
 tude. Ce tresbien cognoissant nostre  
 souuerain Prince en dressant son Edit,  
 soustenu encores de ses ieunes ans, ne  
 se veut pas beaucoup soucier & rom-  
 pre la teste, si chaqū n'a semblable opi-  
 nion de foy que luy, à l'exemple de  
 Theodose le ieune, lequel par sa man-  
 suetude enuers to<sup>9</sup>, de quelque opinion  
 qu'ils fussent, est loué par grande ma-  
 gnificence de l'historien Socrates. Gra-  
 tian l'Empereur considerant le pource  
 & miserable traitement qu'auoit fait  
 son oncle Valens, à ceux qui estoient de  
 la foy Catholique, publia vn Edit, par  
 lequel il permettoit à vn chacun de sen-  
 tir librement de la Religion, & que les  
 Eglises s'assemblassent, excepté les Ma-  
 nicheens, Photinians, & Eunomians.  
 Il est assez clair & apparent de quelle  
 chere ont esté receus les Catholiques

Li. 7. cha.  
 41, & 42.



de leurs competeurs soy disants de l'Eglise reformee, & comment les pasteurs ont esté repoussez de leurs troupeaux : pour donc les reduire en leur bergerie, & mitiguer la mauuaise affection des parties, osera vn fidele & obeissant suiet se mōstrer tant opiniastre, de dire que le Roy n'aye eu argument raisonnable de donner liberté à vn chacun de sentir libremēt de la Religion, sans aucunement estre recherché du fait de sa conscience. Ce que dessus de Gratian est recité par les historiens Li. 7. cha.  
Sozomene, & Socrates. Mais depuis il a 1, & 2.  
reuoqué ceste loy. Ne faites doute aussi Li. 5. cha.  
que nostre Roy ne face reuocation de 4.  
ceste liberté & permission, s'il voit qu'il soit expedient au repos public de son Royaume, comme depuis il a expliqué son Edit, pour le regard de la suite de sa cour. Pensons que ce Royaume de France n'est moins cher & precieux à nostre Roy, qu'est le Royaume d'Escosse à sa Roynes. Or la vertueuse dame bien munie de cōseil à son retour de ce pays au sien, pour appaiser les troubles qui auoient auparauant couru, a permis à tous ses suiets de librement viure en la

Religion, iacoit qu'elle avec toute sa famille persiste & continue en l'obeissance de l'Eglise Catholique, & reconnaissance de la foy & tradition Romaine, comme elle en a fait protestation au concile de Trente. Qui a esté l'occasion de ceste permission, sinõ que la necessité & importance grande des affaires de sa couronne & de son Roy-  
 me. On lit de Iouinian l'Empereur, dedans Socrates, que subitement qu'il fut esleu Empereur, se voyant reduit en grãde extremité par la faim que souffroit sa gendarmerie, apprestee pour combattre les Perfes, fut contraint de faire paix par certaines conditions & contrats, lesquels estoient assez au desauantage de la gloire Romaine, neantmoins necessaire pour l'angustie du temps.

Li. 3. chap.  
 22.

De telle sorte pourroit-on parler de l'Edit de la pacification, qui ne sert pas beaucoup pour augmenter la gloire de l'Eglise Romaine, ainçois qu'il est necessaire pour addoucir la malice du temps. Voire-mais il permet deux Religions. Quant ainsi seroit, permission n'est pas approbation. Dieu permet &



laisse viure les pecheurs, & toute fois ne les approuue. Le Roy permet les lieux publics pour la retraite des femmes eshontees & impudiques : Neantmoins n'approuue les impudicitez & paillardises. Ceste permission ne tend qu'a euitier plus grands maux en la republique. Ainsi est-il de la permission des deux religions. Est-il plus cõtre le cõmandemẽt de Dieu de permettre deux formes de viure en la religion que la permission des lieux impudics ? L'vn est il plus contre l'honneur du Christianisme que l'autre ? Il seroit facile de monstrier qu'il n'y a pas grande difference. Cõsiderons de grace vn peu l'estat des Eglises estrangeres, entre autres de l'Italie, cõme le Patriarchat de Venise. Auquel viuent en concorde & mesme police avec les Chrestiens les Iuifs ? y a-il religion plus contraire au Christianisme, que la Iudaique ? Outre le Grec, qui n'est guere moins differẽt du Catholique en sa religiõ que le reformé a son eglise & ses ministres, auxquels il s'adresse pour le fait de sa conscience : & nonobstant ceste differẽce, le Grec & le Catholique en paix & a-



mitié vsent de mesme police de la ville,  
 sans desdaigner l'un l'autre. Le prote-  
 stât Allemâd, le Mahometiste, qui plus  
 est, semblablement y traffique & vit pai-  
 siblement avec le Chrestien sans discord.  
 Ne pourra donc nostre Roy pour le  
 repos de son Royaume, & la manutē-  
 tion de sa Couronne, l'abolition des  
 discords, par lesquels tout vice est en  
 vigueur, dōner telle police a ses suiets?  
 Le Pape mesme dedans l'enclos de sa  
 grande ville & à son exemple tous les  
 Seigneurs d'Italie permettent aux Iuifs  
 l'exercice de leur religion par toutes  
 les villes de leur suiection, & viuēt trā-  
 quillement avec les Catholiques. Qui  
 empeschera que le Catholique ne viue  
 en paix avec le reformé, aussi bien que  
 viuoient ces trois Empereurs Chrestiens  
 Iouinian, Valens & Valentinian, avec  
 Iulian l'apostat, qui s'efforçoit du tout  
 a abatre le Christianisme? Pourquoi  
 nostre Roy ne se pourra-il seruir de  
 ceux, qui sont contraires à sa Religion,  
 s'ils sont commodés & profitables a sa  
 Republique, cōme à vsé Iulian l'apo-  
 stat du seruice des trois susdits princes  
 Chrestiens. De ce est tesmoin Socra-  
 tes.

tes. Si les François goustoient bien le dire de l'escriture, que meilleure est obeissance que sacrifice, ils se contenteroient de la volôté du Roy, sans plus outre en disputer, & promptement y obeyroient, la Dieu ne plaise, peuple François, que ie dye de toy, ce que dit Socrates du peuple Alexandrin: Il s'esjouist, & prent plaisir en seditiôs, & ne s'adoucist sans effusion de sang. Je diray toutefois hardimēt des conditions des hommes, ces tumultes durans, ce que dit le Psalmiste. Tous ont failly, & se sont ensemble corrompus, Il n'y en a vn seul qui aye bien fait, Il n'y auoit que misere & malheur en toutes leurs œuures, Il n'ont point cogneu la voye de paix & repos: La crainte de Dieu n'a point esté deuant leurs yeux. Et pour faire preuue de ce propos, il ne faut que prendre garde aux œuures & faits de chasque party. De l'vn, à sçauoir de celui du Reformé, plusieurs en ont fait le discours, & entre autres Ronfard: & ne se faut esmerueiller si tant de meschans actes, meurtres, saccagemens & forceneries ont esté commises de ceste part. Car le Reformé est tenu pour he-

Li.3 chap.  
22, & li. 4.  
chap. 1.

li.3. cha. 13.

Pseau. 12.



retique, qui est enfant du diable pere de mensonge, homicide & meurtrier des le commencement du monde, & l'enfant suit volontiers la trace de son pere. Mais c'est chose plus abominable, detestable, & execrable, que celuy qui s'estime & tient pour enfant de Dieu & de lumiere, sectateur de verité & de la foy Catholique, face les œuvres de tenebres, mensongeres & diaboliques. Tant qu'il sembloit, au temps de ses discors, & n'est encore ce mal desraciné, qu'estre Catholique estoit estre larron, meurtrier, menteur, pilleur, ruffien, renieur de Dieu, blasphémateur de son saint nom, & vindicatif, Bref toutes & semblables proprietez faisoient que le Catholique disoit: le ne suis pas Huguenot, & s'estimoit, en reniant Dieu, faire vn sacrifice louable. Si bien mesme que les predicateurs eussent volontiers iuré dedans leurs chaires, pour se faire differens des Reformez, si honte & leurs consciences ne les eussent repris. Tant y a que d'vser de ce mot affirmatif, selon le commandement de Dieu, Certes, & Amen, c'estoit estre huguenot, mesme pour le predicateur,



tesmoin le parangon de tous, qui autrefois en sa predication a demandé pardon apres en auoir vsé. De souffrir patiemment les iniures, à l'exemple de Iesus-Christ nostre Sauueur, il n'en estoit pas mention. Anciennemēt pendant les grandes persecutiōs de l'Eglise Catholique, la patience faisoit la difference de l'heretique & du Chrestien, du fidele & infidele. Je me seruiray, pour prouuer mon dire, de l'exemple de celuy qui fut tué par vne femme Arriane en la ville de Dolicha, d'un coup de tuylle, nommé Eusebe le grād, selon li. 5. cha. 4. que le recite Theodoret. Cestuy estant proche de la mort fit iurer ses amis, qui estoient presens, de luy promettre que ceste femme ne receuroit aucune peine de son meschef, imitant son maistre qui auoit prié le premier pour les bourreaux qui l'auoiēt crucifié: & saint Estiēne le premier martyr: le souhaiterois volontiers que les Euesques se fussent gouuernez avec telle patience enuers leurs malueillās, ses annees precedentes: ils eussent plus gagné & attiré d'hommes foruoyez à penitence & recognoissance de leurs pechez, qu'ils

> n'ont pas fait par leurs beaux corselets,  
 boucliers barselōnois & autres armes,  
 qui ne sont aucunement seantes à ceux  
 qui se veulent faire cognoistre succes-  
 seurs de saint Pierre & des Apostres. Je  
 m'en rapporte à saint Paul & à saint  
 Ambroise, contre Theodose, & à ce rāt  
 renommé Euesque Athanase, contre  
 George Euesque Arrian. On lit en l'hi-  
 li. 6. cha. 4. stoire Ecclesiastique de Sozomene, que  
 les moines en Syrie, estans hays & in-  
 iuriez par les habitans du pays, souf-  
 froient de grād cœur les iniures & tors  
 qui leurs estoient faits, & n'en prenoiēt  
 aucune vengeance. Je laisse le iugemēt  
 à tous, si les moines de ce temps present  
 sont semblables à eux. En Alexandrie  
 estoit vne femme nommee Hypatie,  
 fille du Philosophe Theon, tellement  
 recommandee & renommee pour son  
 grand sçauoir, qu'elle auoit acces en  
 toutes les meilleures maisons des grāds  
 Seigneurs, desquels elle estoit receüe,  
 & chérie, pour auoir le plaisir de sa do-  
 ctrine: entre autres elle auoit grande fa-  
 miliarité avec le Preuost de la ville, nō-  
 mé Orestes, qui auoit eu auparauant  
 noise avec Cyrille Euesque de ceste vil-



le, pour vne desconfiture d'une grande multitude de Iuifs, aduenue à la suscitation dudit Euesque, pour la vindiète d'une autre deffaite des Chrestiens par les Iuifs. Ceste femme, vn iour reuenant de souper de la compagnie dudit Preuost, fut prise par vne troupe de Chrestiens, desquels vn Pierre lecteur estoit conducteur, eux l'ayans deiettee de son chariot la trainerent en vne Eglise nommee Cefaree, & l'ayans despouillee la massacrerent de poirs cassez & de pierres, & la deschirerent membre à membre, & puis bruslerent les membres apres les auoir portez en vne place dite Cynaron. Ce meschef & forfaiture apporta grand deshonneur à Cyrille & à l'Eglise d'Alexandrie. Car débats, meurtres & assassinements sont totalement messeants à ceux qui ont quelque sentiment de Iesus-Christ. Ce sont les parolles de Socrates. En quelle seurété li.7.ch.15. donc de conscience pourrôt demeurer tant d'hommes assassineurs, qui se sont monstrez & manifestez par plusieurs villes de ce Royaume, & qui ont commis plusieurs homicides, sous vn simple soupçon de la Religion, où le plus



li. 4. ch. 36  
li. 2. cha. 6.  
li. 12. ch. 36

souuent pour la vëgeance de leur propre inimitié? Et quāt encore ils eussent esté assurez de la verité, que les morts eussent esté aduersaires de la Religion Catholique, la susdite sentence les condamne, comme fait la sentence de Moyses en Socrates, & Ruffin, & Nicephore, disant, contre Lucius Euesque sanguinaire: Le chrestien ne frappe point, n'iniurie nullemēt, ne debat & ne noïse point. En mon endroit ie tiens pour certain que ceux qui croient en Iesus-Christ & sont ses fideles seruiteurs, ne font point tels actes, leur bonne affection & intention qu'ils portent à l'Eglise les sauue: Si ainsi estoit le fait de Ammonius moine de Nitree, qui auoit entrepris de defendre la querelle de Cyrille son Euesque & des Chrestiens, cōtre les luifs: & sous ce pretexte auoir offensé & blessé le Magistrat, dequoy, apres auoir esté puni, mourut: dōt Cyrille le voulut faire inscrire au catalogue des martyrs, seroit louable contre l'opinion des mieux sentās & affectiōnez à Iesus-Christ, qui lors improuuerent l'affection de Cyrille enuers ledit Ammonius, disant qu'il auoit plustost

souffert peine pour sa temerité, que pour la necessité qui luy fut presentee de nier nostre Redempteur & sa foy. Socrates & Nicephore. C'est vne chose toute asseurée que l'Eglise Catholique reluist par le feu de la persecution, plus pure & munde que le metal d'or. Car la foy n'est pas approuuée és paroles d'un chascun: ains par bannissemens & prisons obscures. Ruffin. Le propre des Chrestiens est d'estre battu. La verité ne se presche & declare par cousteaux & gens armez, disoit Athanase, escriuant à ceux qui menoient vie solitaire. Que si vous me retorquez, que les parties aduerses commettent faits plus abominables, quant ainsi seroit, ie respondray avec saint Cyprian, que nous ne deuons suyure les exemples des heretiques, & aussi ie vous offriray son dire en l'Epistre premiere du premier liure, qu'il n'est loisible aux innocens de massacrer mesme le coupable & le nocent, ains conuient aux Chrestiens de liurer leur sang prôptement & alaiement, afin d'auoir moyen de sortir hors de tant de maux & miseres, puis que si grâde cruauté court en ce siecle,

li.7.ch.14

li.14.ch.15

li.2.cha.6.



Que direz-vous donc de la mort cruelle qu'ont souffert tant de personnages Catholiques, prestres, diacres, moines, & gens des premiers de nostre Republique, & necessaires pour la conseruation d'icelle? Faut-il qu'elle demeure sans vëgeance? Est-il besoin de la prendre en patience? Je supplie le lecteur de recevoir la responce de ceste demande, d'un iugemët Chrestien & simple. Où ils ont enduré la mort pour leurs querelles particulieres : où pour la defense de la foy de Iesus-Christ & de son Eglise. Si le premier est vray, selon que dit Athanase en l'Epistre sus alleguee, ce n'est acte de prudence de se mettre en danger en faueur d'autrui, pour soutenir son mal-talent, & aussi chascun sçait que le bien & repos public est à preferer aux debats particuliers des hōmes, quelques grands qu'ils soient. Si la seconde partie est conforme à verité, ie trouue par les histoires, que tant s'en faut qu'il soit besoin de venger telles morts, qu'au contraire il en faut rendre graces à Dieu. C'est le recit de Sozomene, & de Nicephore. Il y auoit au pays de Syrie, en la prouince d'Apanie

en vn



en vn lieu nomm  Aulo, vn temple de  
 fort gr de structure, & magnifique, le-  
 quel Marcel, Euesque de la nation, par  
 le grand zele qu'il auoit, fist abbatre par  
 vne troupe de gens-d'armes, qu'il auoit  
   ses fins amass . Les ayants enuoyez  
 au lieu pour executer son dessein se c -  
 tint & seiourna en quelque petit lieu  
 prochain, pource qu'il n'estoit ny pro-  
 pre ny habile   combattre. Ce pendant  
 que les gens-d'armes estoient occupez  
   destruire ce temple, quelques Payens,  
 ayants entendu qu'il estoit demeur   
 seul, sortent & s'en vont le trouuer, &  
 subitement l'enuahissans le ietterent  
 dedans le feu. De ce fait les auteurs ne  
 fur t de prime volte & si tost cogneus,  
 toutefois vn peu apr s furent appreh -  
 dez & prins prisonniers. Desquels les  
 enfans du susdit Marcel vouloient fai-  
 re iustice & punition. Ce que defendit  
 & prohiba le Concile, assembl  en ce-  
 ste prouince. Car il ne fut estim  rai-  
 sonnable & equitable de venger la  
 mort, pour laquelle il conuenoit, & au  
 mort, &   sa lignee, &   ses amis ren-  
 dre   Dieu action de grace. Ce que fait  
 l'Eglise en tous ses hymnes, & au vray,

chercher la vëgeance de leur mort, c'est leur tollir & oster la gloire qui leur appartient. Qui voudra scauoir le courroux de Dieu cōtre ceux qui pourchassent les vengeances, lise Ezechiel. Qui a veu & cogneu ces troubles ciuils durant l'execution de la dilection des ennemis? Au cōtraire, on n'oyoit ordinairement qu'imprecations, par lesquelles les Catholiques declarent appertemēt qu'ils ne tiennent pas grād conte d'observer les commandemens de Iesus-Christ leur maistre, & que leur Iustice n'abonde pas d'auātage, & ne surmonte la iustice des Scribes & Pharisiens, & que ses mots, Tuez, & autres, soient alienez de la profession du Chrestien, assez clairement le tesmoigne Chrysostome, qui tient bien autres propos de cecy, que les predicateurs seditieux & mutins. Quelles œures de Catholiques sont celles-cy, tirer les corps morts hors de la terre, puis les brusler, raur par force les corps iusticiez, de la puissance du Magistrat, & puis les mutiler de coups, & deschirer comme bœufs à la boucherie, & faire les petis enfans instrumens de ferité & immanité? l'ay

Ezech. 25.

Chrysost.  
sus le psal.  
140.



horreur d'en faire narré plus ample. Les exemples des autres ne seruiront à couvrir nos fautes. Si vous auiez quelque sentiment vous ne feriez cōtre nos ennemis telles & si horribles insolences. Fust-il iamais plus grand heretique & ennemy de la gloire du fils de Dieu, qui aye par plus grands efforts troublé l'Eglise, que ce notable Arrius? Escoutez maintenant comment se gouuerne en son endroit ce saint Euesque Athanase, voulant reciter sa triste & miserable mort. Ce qu'il eust peu sembler faire par esprit de vindicte, contre celuy qui auoit esté son capital ennemy : La fin commune de tous hommes est la mort, & ne se doit-on gaber & moquer d'aucun mort, iacoit qu'il fust ennemy mortel, veu qu'il est incertain si vous-mesmes passerez deuant le vespce ce mesme passage. Athanase en l'Epi-  
stre à Serapion, Sozomene & Nicephore. Les Ethniques en la loy de nature  
seule, ont iugé estre vne chose fort in-  
humaine & cruelle de médire d'vne parole  
seule des defūts, si bien que Solon  
anciennement en fist vne Loy, defend-  
ant de tenir propos iniurieux de ceux

li. 2. ch. 30

li. 8. ch. 24

&amp; 51.

Jug. 12. 18  
& 21.

qui sont sortis de ce present Siecle. Ce sont aussi actes de chiens, non pas de Chrestiens. Qui voudroit plus outre passer en plus ample declaration des larrecins, depopulations de maisons & pays, violemens de filles & corruptions & autres entreprises contre Dieu, le Roy & tous droits, ce seroit outrepasser les bornes de ceste presente Apologie. Tant y a que lors on pouuoit dire ce qui est escrit au liure des Iuges; Il n'y auoit point de Roy en Israël: ains vn chascun faisoit ce que bon luy sembloit, & se donnoit la loy à soy-mesme. N'a il pas donc esté tresnecessaire, consideré tous ces forfaits qui se commetoient, & le desordre qui couroit par toute la Republique, que nostre Roy aye fait l'Edit de la pacification? Car comme tres-bien disoit Democrite, la sedition intestine & ciuile nuist à chasque party, d'autant que la perte & destruction est esgale, tât au vainqueur qu'au vaincu. Nous en auons veu l'experience. La sedition ostee & appaisée par le moyen de l'Edit, quelle infortune & desastre a receu nostre Roy dedans son Royaume? N'a-il pas chassé & repoussé de son



duché de Normandie ses ennemis per-  
 petuels les Anglois? N'a-il pas vertueu-  
 sement de leur main & puissance re-  
 couuert & remis en sa puissance la vil-  
 le du Haure? N'a-il pas donné congé  
 & renuoyé toutes ces bandes & trou-  
 pes d'Allemands, qui se sont enrichis du  
 butin de ses suiets? Quels ennemis luy  
 sont restez par tout son Royaume, si non  
 que ceux qui ne veulent suyure sa vo-  
 lonté, & ne veulent obeir à son Edit,  
 ne trouuant rien bon, sinon ce qui sort  
 de leur cerueau? Il ne faut pas craindre  
 que Dieu ne luy soit fauorable en tou-  
 tes ses affaires, autāt qu'il a esté à Theo-  
 dose le ieune, duquel il ensuit la clemē-  
 ce & māsuetude enuers ses suiets, pour  
 ne les vouloir laisser en diuorce, quel-  
 que forme de Religio qu'ils maintien-  
 nēt. Car li sçait assuremēt qu'ils redēt  
 tous à la cognoissance d'un seul vray  
 Dieu, & celuy qu'il a enuoyé Iesus-  
 Christ, non de Baal. Iulian l'Apostat au  
 commencement de son Empire par les  
 gestes des Empereurs precedens, trou-  
 ua, pour confirmer & establir le Paga-  
 nisme, que la cruauté des supplices n'y  
 auoit rien profité, mais plustost que les

affaires des Chrestiens, par ce moyen, auoient esté augmentees & rendues plus glorieuses & honorables, entant qu'ils auoiēt voulu mourir pour la doctrine de Iesus-Christ. Parquoy cōme estant marry & enuieux, non comme bien affecté, il pensa n'estre necessaire que, où par feu, où espees, où coups de fouets, meurtrissures, où mutilation du corps, & par les enfouir & enterrer vifs ce qui auoit esté auparauant entrepris, il courust & se iettast sus les Chrestiens, ains iugeoit qu'il falloit persuader au peuple par douces parolles & admonitions, qu'il se conuertist au Paganisme. A ceste cause il reuoqua d'exil, 10<sup>e</sup> ceux qui auoient esté bannis sous Constantin, & leurs rendist leurs biens, & fist commandement au peuple de ne blefser aucun Chrestien, où iniurier où le contraindre par force à sacrifier, ains qu'ils les incitassent à ce par bonnes actes & douces voyes. Sozomene & Nicephore: En ceste façon nostre bon Prince à l'entree de sa couronne en ses ieunes ans, a trouué & cognu que tant s'en faut que la seuerité des tortures, tourments, conflagrations, bannisse-

Li. 5. cha. 4

Li. 10. cha.

4. & 5.



mēts & autres punitions, de laquelle ont vſé ſes anceſtres & maieurs, contre ceux que vous appelez de la nouuelle Religion, les aye reduits & reuoquez de leurs opinions, qu'au contraire, ſe ſont par icelle cōfirmez & fortifiez en la doctrine qui leurs a eſté preſchee par leurs miniſtres, tant que par ce moyen ils ſe ſont vſurpé & attribué le nom de vrais Martyrs, eſtimants ceſtuy eſtre la vraye marque de la verité de leur doctrine & Eglise. Pour ces cauſes il luy a ſemblé bō d'vſer de modeſtie, douceur, clemence & manſuetude enuers ſes ſuiets de l'Eglise Reformee, & leurs permettre lieux pour ſ'aſſembler ſelō leur conſcience, afin qu'ils ne fuſſent veus eſtre ſans Dieu, ſans loy, & ſans foy & Eglise, & auſſi que la condition de leur doctrine fuſt plus manifeſtee à tous par la conuerſatiō de la vie qu'ils menerōt. Car il n'y a nulle doute, ſelon que lon trouue par les hſtoires, que ceux qui ſe ſont eſtrangez de l'Eglise Catholique ne ſe ſoient plus ruynez par eux-mesme, & les aſſemblees qu'ils ont entrepris de faire par la permiſſion des Seigneurs, que par la poursuite des puni-

Nicepho.  
li. 4. cha. 5.

tions que lon aye voulu faire d'eux. Cecy se prouue facilement par les Ariens, qui ont tenu & occupé les Eglises par force, par l'espace de quarante ans, & neantmoins leur opinion en a

Hist. trip.  
li. 4. ch. 10  
& Socrat.  
li. 5. cha. 5.

esté d'autant plus reprouuee. La Tripartite histoire. Car quelque attente & permissiõ que puisse ottroyer le Prince, si ce conseil où entreprise est des hommes, elle sera à la fin mise à neant, res-

Actes 5.

moins le conseil de Gamahiel. Ce sont les considerations qu'a pratiqué nostre Roy en establiissant son Edit, prises & tirees du deuoir de son estat, à l'exemple des Princes & Empereurs qui l'ont precedé en pareille dignité, & de l'esgard du repos public de son peuple, qui luy est plus cher que soy-mesme. Contemplons pour le present les raisons de Messieurs du premier estat, qui est l'Ecclesiastique, par lesquelles ils pretendēt faire entendre que l'Edit ne peut auoir lieu, sauf l'entretènement de leur grandeur & autorité, ains que par iceluy leur Seigneurie est amoindrie & diminuée. Le les estime si grands obseruateurs & diligens de l'Escripture sainte, qu'ils n'y voudroient contreuenir iusques



ques au dernier iota. Je les prie donc  
 treshumblement de faire tant par leurs  
 œuvres, & paroles, qui ne soient com-  
 pris dedans ceste proposition vniuer-  
 celle de Saint Paul. Tous cherchent ce  
 qui leur est propre & cōmode. Au con-  
 traire de ne vouloir se separer de ce cō-  
 seil, ou plustost cōmandement de saint  
 Paul. Il ne faut point que le seruiteur  
 de nostre Seigneur debate : mais qu'il  
 soit bien enuers tous, propre a endoctri-  
 ner, portant patiemment les mauuais  
 avec toute benignité, enseignant ceux  
 qui resistent à la verité, à sçauoir si en  
 quelque temps Dieu leur donnera re-  
 pentance pour cognoistre la verité, &  
 qu'ils reuiennent hors des laqs du Dia-  
 ble estans pris de luy a sa volonté, fils  
 suyuent cest enseignemēt de l'Apostre,  
 ils ne feront rien, que les plus renom-  
 mez Euesques & louables de la primi-  
 tiue eglise n'aiēt fait les premiers, pour  
 raison dequoy ont acquis louange &  
 honneur: A l'opposite, ceux qui se sont  
 entremis d'estre plus rigoureux, & se-  
 ueres contre les Hetherodoxes, ont  
 encouru la male grace de tous, & vitu-  
 pere. Pour le premier ie vous mettray

2. Timot.  
chap. 2.

Sozo. li. i.  
chap. 15.

deuant les ieux ce bon Euesque d'Alexandrie Alexādre, qui s'est opposé formellemēt a l'impicté d'Arrius. Cestuy nonobstant que plusieurs l'accusassent de ce qu'il n'empeschoit les innouatiōs qui se mettoiēt en auant cōtre la vraye doctrine, estime estre plus expedient de donner lieu de cōference a chaque partie, afin qu'il ne fust veu vouloir appaiser les contendents plus par violence, que par douceur & māsuetude, & douce persuasiō. Si Messieurs les Euesques eussent esté a Poissy de c'est aduis, & qu'ils eussent voulu souffrir en douceur & æquanimité conferer toutes les parties avec eux, nous ne fussions iamaïs en telles miseres & calamitez cōme nous sommes. Chacun cognoist qu'en eux y auoit plus de zele, que de vraye charité & humilité ensuyuant Iesus-Christ & saint Paul, qui a plustost cherché ce qui estoit profitable à plusieurs, que soustenu le conseil de son propre cerueau & profit particulier.

Telle diuersité de cerueaux a esté trouuee es Euesques en vn petit Concile qui fust tenu en Alexandrie, pour sçauoir si les prestres infectez d'heresie,



apres la conuerſion, deuoient eſtre re-  
 mis en l'eſtat ſacerdotal. Auquel chari-  
 té & humilité ſurmonta, & le zele trop  
 ardent des autres fuſt repouſſé. Atticus  
 Eueſque de Conſtantinople par ſa pru-  
 dence augmentoit tellemēt les Eglises.  
 qu'il n'entretenoit en amitié ſeulement  
 ceux qui eſtoient avec luy de meſme  
 accord en la foy, ains par ſes ſages en-  
 trepriſes & prudent conſeil eſpouuen-  
 toit & ſurmontoit les heretiques, aus-  
 quels il n'auoit volonté de faire aucu-  
 ne facherie, ains ſ'efforçant les eſtōner  
 ſe monſtroit à eux debonnaire & gra-  
 tieux. Ceſtuy en faiſant ſes aumôſnes  
 n'a voulu auoir aucun eſgard & diſcre-  
 tion de la Religion, ains de la poureté  
 ſeule de la foy, & n'a voulu en aumo-  
 nant ceux eſtre meſpriſez, qui ne con-  
 ſentoient avec luy en la foy les dome-  
 ſtiques eſtre à eux preferez. Je laiſſe le  
 iugement à vn chaſcun, ſi tel a eſté le  
 gouuernement non ſeulement des Eueſ-  
 ques, ains de ceux du peuple Catholi-  
 que, enuers ceux qu'ils tiennent pour  
 heretiques & eſtrangers de la foy. Leur  
 ayder & ſecourir, auoir compaſſion de  
 leurs poure traitement, c'eſtoit eſtre

Ruffin li.  
 1. cha. 18.

Socrat. li.  
 7. chap. 2.

Socra. li. 1.  
 chap. 25.  
 Niceph. li.  
 14. cha. 24.

leurs adherents. Il falloit, par necessité,  
 parler & dire tout haut, tuez, massacrez  
 à sac à sac. Il n'estoit fils de bonne mere  
 celuy qui faisoit difficulté d'vser de ces  
 termes, & ce principalement à la sua-  
 sion de messieurs les Ecclesiastiques. Je  
 l'ay veu cogneu & entendu. Renier les  
 debtes qui leurs estoient deues, c'estoit  
 acte d'habille hōme, mesme en se pariu-  
 rant. Au susdit Atticus a succédé vn au-  
 tre nommé Proclus: & a reluist en luy  
 plus grande clemence, qu'en l'autre.  
 Car celuy-là f'estoit porté & monstre  
 aux heretiques fort espouuentable, &  
 terrible pour quelque temps: mais ce-  
 stuy-cy a esté à tous doux & gracieux,  
 & par ce moyen a pensé qu'il les attire-  
 roit mieux à recognoissāce de la vraye  
 foy, que par violence & rigueur. Car  
 n'ayant destiné de tourmenter & tra-  
 uailer aucune heresie, il a restitué &  
 réduit sauf à l'Eglise l'honneur & digni-  
 té de mansuetude & clemence: & en  
 cest affaire a imité l'Empereur Theo-  
 dore. Car de cestuy le dessein estoit de  
 n'vser de la puissance Imperiale, contre  
 ceux qui seroient accusez: De l'autre le  
 vouloir estoit, ne tenir pas grand con-



te, si quelqu'un ne sentoît de la foy cō-  
me luy. Les Euesques, qui ont voulu  
par cy deuât & veulent encore se main-  
tenir à l'exemple de se bon pasteur, sont  
tenus pour suspects, & sont regardez de  
mauuais œil, & neantmoins l'histoire  
declare que douceur & grace maintiēt  
& soustient l'autorité de l'Eglise. Les  
autres qui ont porté les armes, contre  
le deu de leur estat, estans enuironnez  
de compagnie de gens armez, comme  
Pilate, sont magnifiquement louez, ho-  
norez & reuerrez, Si bien que le susdit  
Proclus eust esté pour le present tenu  
pour Huguenot. De telle patience &  
de bonnairété enuers leurs aduersaires  
se sont cōportez les Euesques qui auoient  
esté enuoyez en exil par Valens l'Em-  
pereur, apres la reuocation qu'en fist  
Gratian par Edit. Car eux en leurs re-  
tour trouuans les Arrians saisis de leurs  
Eglises & diocese, n'eurent aucunemēt  
affection de presider, ains voulurent  
preferer la paix & concorde du peuple  
à leur priuē honneur & bien, & prierēt  
leurs peuples de ne vouloir dechasser  
& abandonner les Euesques Arrians,  
de peur qu'ils ne separassēt par diuision

Socra. li. 7.

chap. 41.

Nicepho.

li. 14. cha.

38, &amp; 41.

Sozo. li. 7.

chap. 2.

Nicepho.

li. 2. ch. 4

l'Eglise, laquelle delaissee & dōnee de  
 Dieu & des Apostres vñique, auroit  
 esté malheureusement diuisee par les  
 contentions & ambitions. Si messieurs  
 les Ecclesiastiques auoient ceste confi-  
 deration, que l'ambition a causé tous  
 les schismes qui voguent pour le iour-  
 d'huy, ils abaisseroient leurs cornes, &  
 filleroient plus doux, & mitigueroient  
 leur grande Seuerité. S'ils ont esté re-  
 poullé de leurs Eglises, le Roy les y  
 remet par son Edit: les autres y sont  
 entretenus & contregardez. Neant-  
 moins ne peuent tolcrer & permettre  
 que le Roy soit obey en son Edit pour  
 faire sortir de son Royaume toute sedi-  
 tion, & reduire ses suiets en paix & re-  
 pos. L'Eglise ancienne a esleu autrefois  
 pour Euesque vn docte Philosophe de  
 nom Synesius, lequel toutefois ne re-  
 ceuoit l'article de la Resurrection, &  
 protesta en son election de ne vouloir  
 estre contraint à laisser son opinion, ce  
 que l'Eglise luy accorda, s'accōmodant  
 au tēps & aux circōstāces. Vous voyez,  
 messieurs les Euesques, la malignité &  
 corruptiō du tēps, qui a precedé la per-  
 te de tāt de peuples, la ruine d'yn si opu



lent Royaume, & ne vous pouuez accommoder à l'infirmité de tant de personnes pour les laisser viure selon leur cōscience, selon la permission que leur en fait nostre tant benin & clement Roy ? Gardez-vous que vostre trop grande rigueur ne vous nuysse, comme autrefois elle a fait à Theodose Euesque de Synade Pacatiane, lequel par auarice, poursuyuant contre les Macedoniās heretiques des Edits Imperiaux fust demis de sa dignité Episcopale par sō peuple mesme, la partie aduerse surrogée en son lieu. Or, dit l'auteur Socra-  
 tes, entreprenoit-il ceste poursuite cō-  
 tre la coustume de l'Eglise Catholique,  
 laquelle ne persecute & n'afflige aucū,  
 quelque ennemy qu'il soit. Aujour-  
 d'huy c'est l'Eglise, c'est à dire, les Ec-  
 clesiastiques, qui fournissent deniers  
 pour faire la guerre à ceux qui deuroiēt  
 attirer au chemin de verité, par predi-  
 cations, exhortations & longuanimi-  
 té: C'est l'Eglise qui incite le peuple Ca-  
 tholique à sedition, au lieu de luy don-  
 ner instruction de paix & concorde:  
 C'est l'Eglise laquelle n'a pour agrea-  
 ble l'ordonnance du Roy, au lieu de luy

Socra. li. 3.

chap. 2.

Nice. li. 14.

chap. 12.

redre toute obeissance. Nestorius Eueſque de Constantinople ſurpris de meſme ardeur de zele que vo<sup>r</sup>, fuſt ſi temeraire que de crier tout haut à l'Empereur: Donne-moy, Empereur, la terre purgee & vuide d'heretiques, & moy en eſchāge, ie te dōneray le Ciel. Abyſme avec moy les heretiques, & ie ruyneray avec toy les Perſes tes ennemis. De fait il les perſecuta de telle ferocité, qu'il deſpluſt par apres tant aux Catholiques, qu'aux heretiques, & fuſt appelle boutefeux. Ioint que Dieu permist qu'en fin il cheut en heresie, de laquelle il moleſta grandement l'Egliſe Catholique. Voila l'iſſue des trop ſeueres Eueſques, recitee par Socrates & Nicephore. Il y a danger qui ne vous en aduienne autant, meſſieurs les Pasteurs, Car vous ne vous eſlongnez pas loin de la façon de faire des ſuſdits, comme le declarasteſt aſſez à Poiſſy, & le faiſtes encore entēdre au Roy par vos remonſtrances, eſquelles vous vous ſeruez de la comparaiſon de la police & œconomie particuliere, avec vn Royaume, qui n'eſt, ſelon voſtre dire, qu'une maiſon & famille multipliee & amplifiee.

Le re-

Socra. li.7

cha.29.

Nice. li.14

cha.31.



Je reçois la comparaison, ainsi que la proposez. Si donc il m'est possible de vous monstrier que la diuersité de Religion n'est du tout contraire à la paix d'une famille, & qu'elle se peut compatir en vne maison, vous me confessez qu'en vn Royaume elle se peut tolerer. l'estime que ne voudriez reprendre saint Paul. Or vous est tout notoire ce qu'il dit. Que si quelque frere fidelle à vne femme infidelle & qu'elle consente demourer avec luy, il ne la peut dechasser, ains veut qu'elle luy soit compagne, & qu'il la recognoisse pour femme: & autāt de l'autre part. Diuersité d'oc de religion n'empesche pas la cōmune conuersation & police entre les hommes estants conioints par mariage. Je vous laisse à conclurre. Et pour confirmation de mon dire ie me feruiray de l'exemple du Patriarche Iacob, en ce qu'il n'a laissé d'habiter avec Laban son oncle & son beau-pere, cōbien que Laban eust des Idoles en sa maison & qu'il fust Idolatre. Autāt en diray-ie de Rachel femme de Iacob, qui a esté nourrie en celle maison, & qui a emporté avec-elle lesdites Idoles,

1. Cor. 7.

Genes. 31.

4. Rois 5.

1. Rois 2.

Genes. 16.

quād elle s'en est allée de la maison d'iceluy. Le seruiteur du Roy de Syrie Naaman Syrius, n'a-il pas seruy son maistre, qui estoit Idolatre iusqu'à flesc-  
 chir le genoil deuant les Idoles pour le serui-  
 ce de son Seigneur. Par ces exemples il est manifeste que la difference de Religion ne tollist des familles l'amitié & concorde, de ceux qui en sont, comme Dauid n'a pas fait difficulté de demander & pourchasser pour son salut, l'amitié & cōfederation du Roy Achis, iacoit qu'il le cogneust estre Idolatre. Vous remonstrez tresbien au Roy, que si en vne famille la concubine se veut preferer à la femme & legitime espouse pour parler plus haut, qu'il en aduiēt vn grand desordre & confusion. Mais vous n'ignorez-pas qu'autrefois la modestie des femmes legitimes a esté si grande, que pour engendrer enfans & auoir lignee, elles ont souffert à leurs maris vne concubine, ainsi que lisons de Sara, qui a permis à Abraham son espoux d'yser de sa chambriere Agar. Que s'il y a eu desordre en la famille, c'a esté par l'orgueil de la concubine, nō de la femme legitime. Par se moyen



la concubine se retirera d'elle mesme, sans estre chassée hors de la famille. En ceste façõ toutes heresies se sont d'elles mesme aneanties. Et ont esté souffertes par les Seigneurs en leurs Republicques & tolerees par les Euesques modestes, pour empescher les guerres intestines, par lesquelles tous Royaumes sont redigez à neât. Mais pour ne sortir point hors de propos, quelle note d'infamie sera-ce à vne maison, si la legitime espouse ne recognoist son vray espoux, & adhere à ses ennemis, bref qu'elle se foruoye tellement de son deuoir qu'elle contraigne ses enfans l'abandonner, & la mescognoistre pour vraye mere? L'auarice, ambition & superstition a causé le diuorse de Iesus-Christ avec l'Eglise, c'est à dire, les Ecclesiastiques: d'autant qu'il n'y a point de conuenance de luy avec Belial, des tenebres avec la lumiere: qui a esté la cause pour laquelle les domestiques se sont separez de leur mere, pensans qu'il vaut mieux suyure le chef, que la mere qui degene- re de son naturel amour & condition. Or persistons en nostre comparaison. Puis que l'Eglise Catholique est espou

se de Iesus-Christ, comme tous Chrétiens le confessent & aduouent, ie ne fais doute que ne vouliez cōfesser qu'elle ne vueille ensuyure en tout & par tout les proprieté de son espoux, & le vray naturel d'une mere bien cōditionnée. Son espoux, en plusieurs lieux de son Euangile, se fait semblable au vray pasteur & berger, lequel abandonne son troupeau pour aller chercher la breby errante. La mere douce de ses cōditions naturelles ne peut iamais oublier son enfant, & quelque chose qu'il soit iugé des medecins s'efforce de tout son pouuoir de le remettre en son estat de santé. Les conditions sont fort estrangeres des termes ordinaires que vous tenez, messieurs les Ecclesiastiques, en criant au peuple, chassez, tuez, bruslez. Vous vous seruez assez du nom de l'Eglise: mais de suyure ses vertus naturelles vous n'en tenez cōte. Pensez qu'elle reçoit plus de blasme des vilenies & ordures, desquels vo<sup>9</sup> estes souillez, qu'elle n'endure de mal des persecutions des tirans & heretiques. Je m'en rapporte à saint Bernard. Vous ne ressemblez, messieurs du clergé, à ceux d'Antioche,



lesquels par l'espace de trente ans ont  
 souffert en leurs Eglises les Arrians, su-  
 stantez de l'esperāce d'un meilleur tēps.  
 A l'oposite, vous ne pouuez porter gra-  
 tieusemēt apres tant de maux & mise-  
 res, vn seul demy-an iusqu'à la definitiō  
 d'un bon Cōcile general & national,  
 la permissiō que fait le Roy, à ceux qui  
 ont scrupule de cōscience de frequēter  
 & cōmuniquer avec nous pour la cor-  
 ruption des abus qu'ils disent que vous  
 maintenez en vostre Religion. Si vous  
 auiez souuenāce des histoires, vous ne  
 seriez si desdaignez & cōtristez contre  
 l'Edit de pacification, cōme vous estes.  
 Car il est facile à veoir par icelles, que  
 les assemblees des Nouatiāns ont esté to-  
 lerees en l'Eglise Romaine mēme, ius-  
 qu'au tēps du Pape Celestin, qui a suc-  
 cédé à Boniface, successeur de Zozime,  
 lequel leur defēdit de faire assemblees  
 & auoir Eglises. Dequoy l'enuie & l'ā-  
 bition, qui auoit ia occupé l'Episcopat  
 Romain, pour la poursuite des hon-  
 neurs mondains, auoit esté cause & ar-  
 gument. Au cōtraire aduint au Clergé  
 de Cōstātinople lequel ne les receuoit  
 seulemēt amiablement dedans la ville,

Socra. li. 6.  
chap. 11, &  
li. 7. ch. 27.

ains leur permettoit de cōgreger & assembler les peuples és Eglises. Exēple d'Atique, q̄ estoit Euesque d'icelle ville. Le vo<sup>9</sup> laisse à iuger, s'il vaut mieux suivre enuie & ambition, que douceur & humilité. Quant aux persecutions que les Catholiques ont enduré du temps des enfans de Cōstantin par les Arriās, que vous obietez au Roy, vo<sup>9</sup> luy feriez grand deshōneur, si vouliez mettre en auant qu'il fust tāt fauorable aux heretiques & fist autant mauuais visage aux Catholiques que les susdits. A la faueur & support desquels l'Eglise catholique estoit tourmētee, molestee & affligee. Mais nostre Roy avec sa mere s'en declare tuteur, defenseur & protecteur: Lequel vous sçauiez & cognoissez fort bien n'auoir pas faute de moyen d'empescher, que ny les vns ny les autres, vsent ensemble de parolles iniurieuses & prouoquātes à sedition, si ses Magistrats y veulent tenir, selon iustice & equité la main, aydez de la force des Nobles, lesquels ne font doute que toute leur grandeur est soustenue par l'obeissance du Prince, sous le bon cōseil duquel consiste la gloire, puissance, &



augmentation du Royaume. Iusqu'aujour-  
d'huy vous avez vescu & dormy, tant se-  
lon vos aises, qu'il vous fasche d'estre res-  
ueillez, & veoir gens qui vous guettent de  
si pres. C'est Dieu qui les vous suscite, afin  
que preniez plus garde à vostre deuoir, que  
vous n'avez fait iusqu'à-huy, & que vous  
laisiez ce trop grand soin des affaires mon-  
daines, sachans tresbien que le gendarme de  
Iesus-Christ ne s'empesche des affaires de ce *1. Tim. 6*  
môde. Car il est impossible de seruir à Dieu  
& au diable. Suyuez le conseil de saint Paul,  
& fuyez les questions & debats de paroles,  
desquelles sourdent enuies, contentions, bla-  
sphemes, soupçons mauuais, guerres & noi-  
ses, & autres infirmités de maux. Suyuez iu-  
stice, pieté, foy, charité, patience, mansuetu-  
de, & la paix avec ceux qui inuoquent Dieu  
de bon cœur. Preschez la parole, incitez en  
temps & hors téps: Reprenez, tancez, exhor-  
tez en toute douceur d'esprit, & mansuetu-  
de de doctrine. Abandonnez les œuures de  
tenebres, & vous vestez des armes de lumie-  
re. Lors vous verrez que vo<sup>s</sup> attirerez à l'o-  
beissance de l'Eglise Catholique plus de peu-  
ple, que par toutes les forces d'armes de to<sup>s</sup>  
les Princes de ce monde: Lesquelles nostre  
bon Roy a voulu faire quitter & laisser à son  
peuple, parce qu'il cognoissoit, selon le dire  
du Prophete Osee, que la permission d'icel- *Osee 4.*  
les auoit chassé de la terre, verité, misericor-  
de & la cognoissance de Dieu.


Pariurement, menfonge, homicide, larcin & adultere eftoient desbordez, & le fang n'efpargnoit l'autre fang. Remerciez Dieu donc, Meflieurs, avec tout vofre peuple, de ce qu'il a infpiré le Roy à pacifier les troubles & chaffer le defordre qui moleftoit, greuoit & tourmentoit tant tous fes fuiets. Cōtētez vous d'obeir à vofre Prince, qui vous aime cōme fes enfans. Repouffez de vofre cerueau toutes fes raifons, qui vous induifent pluftoft à fedition, qu'à paix & repos. Incitez vos peuples à la dilectiō de leurs ennemis, non pas à les tuer & massacrer. Soyez parfaits en icelle, comme noftre Pere qui eft és Cieux. Ce font icy les plus propres moyens par lesquels vous vous ferez apparoir eftre obeiffans & fideles feruiteurs du Roy, duquel, Monsieur l'Orateur, à toutes vos Remōltrances ne pouuez receuoir plus propre refponfe, que celle que fift Valentinian à fes foldats, ainfi qu'en fait recit Sozomene & Nicephore. Que l'adminiftration de fon Royaume ne gift pas en vofre arbitre & iugement, mais au fien. C'eft à luy de vous commander, & à vous d'obeir promptement. Si vous le faites, ce fera vofre bien & honneur.

Sozo. li. 7.  
chap. 6.  
Nicep. li.  
11. cha. 1.

F I N.










275

  
THE  
NEWBERRY  
LIBRARY

